

MINISTER BEKE TA PONE NEL ODUBER NA SU LUGAR

ORANJESTAD(AAN): Riba ponencianan di ex prome ministro Nelson Oduber, contra Minister Beke relaciona cu investigacion di Lotto pa Deporte, Minister Lily Beke a duna su contesta ayera y poniendo Sr. Oduber na su lugar.

Segun Minister Beke, pa e gobierno aki interes di Aruba y su habitantenan ta di mas importante.

Si ta simpatisadonan di OLA of di AVP ta esnan cu a comete error, nan mester carga e consecucionan di esaki.

Minister Beke ta muestra cu Nelson Oduber por ta masha tranquil pasobra "e Madame Beke aki, no ta bisa solamente A y B, pero si ta necesario e resto di A,B, C tambe y sin distincion di persona".

E ta splica cu e diferencia ta cu e gobierno aki ta sincroniza su boca cu su sinti y no manera olifantenan cu ta perde cabez den un cashi di porcelana.

Si resulta cu den Lotto pa Deporte a comete cosnan fraudulentu, e pasonan necesario lo ser tuma, si ta trata di simpatisadonan di OLA, AVP, MEP of di otro partido, lo no haci diferencia.

Minister Beke ta haya cu ta di lamenta cu e culpablenan principal di e problemanan di Lottopa deporte ta esnan cu ta sali liber di esaki.

E ministro responsable y prome ministro di e gobierno anterior lo sali liber pero de facto nan a laga hop di desea. Directiva y director sin ningun control a haya man liber pesey di añanan 91, 92 y 93 tin un debe cu a ser crea di rifanan bendi di alrededor di un millon y ni e ministro responsable y menos ainda prome ministro a kibra cabez cu esaki aparentemente.

Minister Beke a splica mas aleeuw cu for di expresionnan denigrante di Nelson Oduber por a nota cu e tin algo contra hende muher.

"Suerte ta cu e "Madame Beke" aki tin un reglamento cu ta sirbi bon den politica.

"Hendenan decente no ta insultami, hendenan sin decencia no por insultami".

Minister Beke a muestra cu na interes di Aruba y di

Lotto pa Deporte, e lo sigui e desarollonan y investigacionnan hopi cuidadoso y cu e e resultadonan e lo ta trece dilanti den Staten "cu na nomber di pueblo por encargami na publica e resultadonan y Nelson Oduber y su fraccion por dicidi hunto den Staten riba esaki".

Den La Prensa di ayera tardi, bao di "politica" a worde publica e articulo cu ta bisa cu "Bao nanishi di Nel Oduber a "mafia" den Lotto pa Deporte", "E mes a admiti esaki publicamente".

E articulo ta bisa cu Nel Oduber, ex prome ministro di Aruba ta un persona masha intrigante mes y hasta por pusta placa cu e ta e gran campeon di e division aki.

Nel a pensa riba un bon "stunt" pa contradeci tur e barbariddnan cu ta bin afo mente pa loke ta Lotto pa Deporte.

Den su afan pa desprestigiar su rivalnan politico, e lider

di MEP ta trata di pasa pa "leuk" y ta pica pa mira con den e proceso aki, e ta ridiculiza su mes na tal nivel, cu ta laga hende pensa si enverdad e por papia algo sensato un dia, segun e articulo.

La Prensa a muestra cu ora cu scucha Nel declara na Radio cu esnan cu a "mafia" den Fundacion Lotto pa Deporte", e no ta para keto un rato pa ripara cu enverdad su persona como ex prome ministro ta bon na altura cu nan tabata mafia den lotto, sin cu su gobierno un dia a lanta para y caba cu e bagamunderia aki. Ta un verguenza scucha e persona aki papia di e cosnan aki, ya cu e ta haci dolor di sa cu un dia e tabata nos Prome Ministro, segun e articulo di La Prensa.

E corant a bisa cu "si enverdad esnan cu a mafia den Lotto, manera Nel Oduber ta pretende ta

hendenan di AVP y OLA, anto e pueblo aki por bay drumi tranquil anochi, cu

e tin un gobierno awor cu si ta defende su interesnan.

Un gobierno cu no ta tapa pa su hendenan y cu realmente kier mira e pais y su pueblo progresa.

Si Nel tin razon, y ta trata di hendenan di e partidonan di gobierno, anto ta siña so e por siña di esaki, y no sconde manera den pasado el a haci pa hendenan di su partido y hasta hopi cerca di dje, cu a comete actonan cu ta liña recta contra ley y contra interesnan general..

E vespertino a publica cu ta tristo pa scucha un homber, cu pa cinco aña tabata cara di e pais aki admiti publicamente y den forma bon cla, cu NAN a mafia den lotto abao di su propio nanishi.

Cu masha tofheid e ta grita awor cu e ta laga e honor na Minister Lily Beke, pa anuncia esnan cu a mafia pasobra e si no tin e curashi y no ta carga e carson pa haci esaki.

Ta "Madame Beke" ta duna e ehemplo kico ta goberna cu caracter,

maneha cu mente sano, maneha pa pueblo. Si ta un dama ta muestra Nel con mester para den su sapato y pueblo mester ta orgulloso cu ta minister Lily Beke a bin dilanti y pone orde. Un homber manera Nel no tabata por.

Mas aleeuw La Prensa a menciona cu Minister Lily Beke tin un mente sano y positivo y como mandatario y sa pakico e mester bisa cu no mester haci daño na imagen di Lotto pa Deporte. Minister Beke ta compronde e importancia di un loteria nacional manera Lotto y ta compronde ki rol importante esaki ta hunga den comunidad.

Nel di otro banda cu su declaracion contra Lily ta muestra cu e no por distingui entre malo cu bon, ya cu loke ta sali for di su mente ta odio, venganza contra esnan cu ta mustando cu el a goberna malo y a permiti cosnan tuma lugar cu ta contra e interes general di pueblo, segun e vespertino.

E SINTERKLAAS DI PUEBLO !!!

